

Ed il Gambun va aunc adina per il sontg Ieli

da Vic Hendry, Schaffusa/Sedrun, Calender Romontsch 1997, pagina 360

Na, il num **Gambun** ei en nies cass buca disfiguraus, mobein sulettamein midaus en romontsch, essend che la terminaziun dalla schlatteina **Gamboni** suera dil talian. E buca senza raschun han ins semplamein detg Gambun e stgavo. Ton che era jeu setegnel vidlunder.

Ils Gambuns (Gamboni) derivan dad Augio en la Val Calanca, ozildi ei la pintga cuminonza Augio integrada alla vischnaunca da Rossa. Apropos. Ina secunda lingia dils Gambuns ei sefatga en Tumliasca, a Tumeagl; la schlatteina sescriva Gambon — ed ha aschia in colorit aleman. Quella genealogia che sesanfla els mauns da colonel Christian Gambon (1919) da Tumeagl/Friburg indichecha negliu il svilup dils Gambuns (Gamboni) a Pardomat-Dado ed era buca quel en Tujetsch.

Di, tgi enonuscha buca il Gambun da tschereschas da pader Baseli Berther (ord la brochura: Sin Cadruvi, 1904)? El, il Gambun, ei staus in um vegl cun caultschas cuortas ed ina cassacca blava che ha giu si dies ina truca cotschna en fuorma da turnister ed in canaster en bratsch. Per tschun raps ha el dau in pugn plein tschereschas dultschas als «buézs». Mo l'indicaziun dallas tschereschas dultschas e dil bien cor dil Gambun ein per dabia buca tut. Plitost quei che suonda aunc. Dapi che enzatgi seregorda ein ils Gambuns stai ils pots dil sontg Ieli atras l'entira Surselva. Ed igl ei stau ina procura honoreivla da rabbitschar en ina cofra quadra e nera ils treis sogns Ielis, numnadamein:

Igl Ieli per il batten

Igl Ieli per la creisma

Igl Ieli per ils moribunds da Glion entochen a Sedrun.

Igl ei fetg probabel che pader Baseli Berther plaيدا en siu raquent dil Giusep Antoni Gamboni (1829-1896). El ei igl emprem Gamboni ch'ei screts en ella statistica dalla Val Tujetsch. Naven da lu tocca sil di dad oz ein 97 (navontasiat) persunas cun la schlatteina Gamboni naschidas e registradas en la val. San ins maneivlamein s'imaginar. Il bab da Giusep Antoni, il Fidel Antoni Mudest Gamboni (1802-1871) ch'ei semaridaus cun Maria Catrina Schmedt (1798-1857) — ella ei stada in bien ton pli veglia ch'el sez — vegn ad esser vegnius en la Val Tujetsch sco fumegl u pastur e cun pauchet en sac. Ed el ei semess en a Sedrun, en casa gronda sur baselgia, ual oragiusut il Cadruvi. El che ei staus screts el register da Sumvitg (oriunds da Pardomat Dado, ina fracziun da Cumpadials. A Pardomat Dado sesanfla aunc oz ina casa pintga e veglia ch'ils vischins numnan la casa dils Gambuns (Giulia Monn-Foppa) che stat sezza a Pardomat Dado. La casa ei decadenta e porta il numer blau dalla casa cun la cefra 269; siu il quader sut il tetgal stattan ils bustabs MAC (il C ei buca da leger schi clamein — savess eventualmein esser in G sespiars. Perencunter igl orsal 1802 ei fetg legibels. Priu il cass ch'il bustab grond davostier fuss in G, savess la casa esser dedicata da Christian Giusep Gamboni e da sia consorta Margareta Decurtins (ils orsals dils dus consorts ein buca enconuschents) a lur fegl Fidel Anton Mudest Gamboni ch'ei naschius igl onn 1802.

Igl ei stau igl onn 1885; quei fallescha buc. Cunquei ch'il bab Giusep Antoni Gamboni (1829-1896) ei maina turnaus si dil Schuob — ed ei fuva neras uras dad ir per il sontg (pressapauc ina jamna avon gievgia sontga) ha ei tuccau al fegl Sep Fidel (1866-1945) da prender ina decisiun. Quei ei igl emprem da metter vitier. Ils vischins ed il farrer Francestg Eduard Muoth vevan giu confidau al Giusep Antoni ina missiun, numnadamein dad ir cun ina partida Schuobachechlers giun Baviera, mattatschs e mattatschas ch'el ha giu da metter sut. Cumpatg ch'el veva giu bien e ditg da plazzar. Tonca il fegl Sep Fidel ei semess en siala, el cun ses scheniv onns che era struschamein vargaus ils cunfins ed insumma mai staus giu Cuera. Enten trottar atras il marcau da Cuera, eis el per schabetg daus encunter siu bab. Mo gliez schi beinvegnius fuvi siu bab aunc maina staus ad el, uss duront il mument dalla gronda fatalitad. Ed il bab ha priu risguard ed ha mussau agli il casti digl uestg, laatedrala e las ulteriuras caussas necessarias. La cerimonia en baselgia e la benedicziun dil sontg Ieli han fatg al Sep Fidel ina impressiun cuzzeivla.



Giusep Antoni Gamboni (1829-1896)



Giusep Fidel Gamboni
1866-1945

Duront l'entira cuorsa a cavagl eis el staus cunscients dalla rihezia ch'el veva cun el en siala.

A Glion ha igl um dil songt Ieli entschiet a partgir ora siu scazi. Ils spirituals dalla Lumnezia e quels dalla Foppa ein vegni ed han retschiert cun reverenza ils sogns Ielis per las pleivs - las caplanias. E silsuenter ei il Sep Fidel Gamboni sefermaus a Tavanasa per distribuir als logs da Danis, Dardin e Breil. A Trun ed a Sumvitg ha el turnau a tener eri – ils plevons e lur caplons ein vegni encunter. Tuts cun profund respect enviers la repartiziun. Ed el arriva per tard el vitg da Mustér, lu bein empau stettis. L'entira cuorsa a cavagl veva tuttina cuzzau ton sco ina jamna entira. Ed el s'entarda auncallura ina brava uriala en la vischnaunca da Mustér – per semetter finalmein sia via encunter Tujetsch.

Epi - san ins bein avunda, ina interpresa semeglionta va pil solit nuota senza incaps giud il scav. Inaga u l'autra sa il cavagl ballistrar, ni che schiglioc enzatgi vegn els peis. Ina sentupada ha Sep Fidel tuttavia tenui bein endamen.

Igl ei stau in da quels avrels apartis e l'aura veva fatg ora ed ora striegn. Bletsch e freid e brentina senza calar.

Sep Fidel Gamboni dat en da Valzeinza encunter la Val Franzosa. Si da Reinsut tila in vent satel agli en fatscha. Sco unglas sgrefla la neiv ferdalenta e renta vid la detta. A per cun la neiv arrivian ils schems orasi dalla Val Franzosa. Schuldada sturnida e ruclada en tgaubrochels giu pils rovens.

Matei ch'el ha mo quitaud dad udir ils schems, aschia persuls enamiez la stgiraglia. Quei sa capitar. Igl um sin il cavagl less far in bien meini. Enaquella vesa el a vegnend encunter in utschac stermentus. Sto esser ch'il cavagl ha era fatg stem; el aulza in per gadas ils calzers davon. Il monster ner sco la notg vegn pli e pli datier.

Suenter esser ius cun il maun sur il frunt - setegn igl um a cavagl vid la truca dil songt Ieli. Pongir, il songt Ieli ei aposta per tgi ch'ei en prighel. Ed en ina stat igl glimari sidretg avon il cavagl. Sep Fidel tscherna per la letga il profil dalla fatscha. Igl ei negin auter ch'il hermer bergamasc ch'ei sco el s'entardaus sin via. La truca si dies e la capiala lada veva fatg ordad el in utschac da sgarschur. Il hermer veva temiu sco el.

Els mo ual salidan l'in l'auter e dattan omisdus il tgau. Il stgir dalla notg veva gnanc fatg stem.

Suenter ver ademplitu tschunconta onns il niebel uffeci da ir per il songt Ieli a Cuera, surdat Sep Fidel Gamboni la missiun a siu fegl Giachen Giusep, il sulet descendent masculin. Ils dus ulteriurs fegls ein stai morts da pign.

E cun ses gleiti siatont'onns mira il Sep Fidel aunc inaga anavos. Siu bab Giusep Antoni vegn agli datier. Sco per exempel lezza sentupada a Cuera, mond el per l'emprema gada pil songt Ieli. Ed atgnamein ha el, il Sep Fidel, tratg in tec ord schlattaina. El ei staus plitost da paucs plaids e retratgs. Tonca el ha giu ton sco nuot dil humor schetg da siu hab che ha saviu dar veta ad in'entira raspada empau eria cun ina detga sturnidada. Mo gliez ina ch'ins siglievi tut agrads. Remarcabel s'ei Iu schon magari - co las caussas s'artan. E quella sturnidada anetga ei semantenida pulitamein en certas famiglias dalla schlattaina Gamboni.

Da l'autra vart tucca ei da metter vitier. Il Sep Fidel Gamboni ei buca mo staus in um hofli e cun risguard, el ei staus ina persuna spargnusa ed inschignusa che ha pinau l'iseglia ed ils uaffens ch'els auters han fatg empaglia.

Ferton ch'igl ei stau ils onns nauschs da miez ils anno trenta. Cura che il Giachen Giusep Gamboni (1904-1971) ei semess la mesjamna dalla Jamna songta sin via a Cuera per il songt Ieli. El ei ins cun il tren; il Sep Fidel perencunter era aunc ius ils davos onns in toc silmeins, cun la menadira. E siu cavagl alv s'udeva cun el, sco mo in cavagl sa s'udir cun il vitturin.

Jeu sai buca cavigliar exactamein il num dalla Nella, jeu manegel, cun tgi il num ha s'udiu, cun tgei cavagl. Mo Nella ei restau fermamein el tgau.

Pader Baseli Berther ha mess giu la pretensiun. Ch'in dils antenats Gambun hagi giu maridau ina Nell da Sogn Pieder neu dall'Austria. Ed jeu sedamondel: S'ei forse tuttina enzanua cheu in scav? Ualvess che la sora da Sep Fidel, la Maria Catrina Elisabet (1864-1902) seigi dada en il scavaz da sturnidar. Ella ei ida bien e baul en claustra ad Ingenbohl, leu nua ch'ella ha priu il num Zaccaria. Quei num ha en mintga cass fatg ina stoda impressiun, essend che duas persunas dalla descendenza han num quelluisa.

Tonca il fegl Giachen Giusep Gamboni (1904-1971) ha maniau la mesjamna songta tier sia sora



Giachen Giusep Gamboni
(1904-1971)

Margareta Maissen-Gamboni (1902) a Cuera. El ei dapi lu adina staus in um dalla messa marvegla. E quei per cass è a Cuera. Naven dalla damaun allas tschun entochen allas nov eis el mintg'onn staus en laatedrala. Empau da liungas funcziuns, forsa schizun per il Giachen Giusep ch'ei adina staus stedis el survetsch divin.

La distribuziun sco tala serepeta; dil tren anora partga il Giachen Giusep Gamboni ora il sontg Ieli e quei a Glion, a Tavanasa ed a Trun. Il tschancun naven da Trun entochen a Sumvitg eis el adina ius a pei, matei pervia dalla schliata comunicaziun dil tren. A Rabiun ha il Giachen Giusep era entupau igl augsegner da Surrein. Ed igl ei stau da secapir e natural ch'ils spirituals han mintgamai spitgau il Gambun alla staziun. E la surdada dil sontg Ieli ei stada pleina da stema e respect. A Sumvitg eis ei capitau inaga ch'il scolast ei vegnius cun sia scola alla staziun; muort spir reverenza ha el accumpignau il plevon.

Na, il Giachen Giusep Gamboni fuss mai vegnius inaga la gievgia sontga tocca Sedrun, era lu buc, sch'ei vess e tonsch pervia dil temps. Enstagl da cuntinuar siu viadi eis el staus sur notg sin claustra. Quella manida en claustra ei ora ed ora stada per el in schabetg nundetg. Secapescha ch'il pader ceremoniari (pil pli il pader Sigisbert Zwicker) ha fatg cun el bien e pli che bien; el che ha nuota nuidis schau sepuppergnar. E la finala veva el era fatg si in fumegl a casa ed aschia tuttaviva buca fuola. Epi - ils ses dueien mo spitgar in'uriala ils ovs da Pastgas ed ils mams.

Probablamein s'ei aunc stau in'atra.

La gievgia sontga da mesanotg vevan ils Gambonis da ir en baselgia a far l'ura. Neve - levar da quellas uras ed ir en tutta ferdaglia a far oraziun. Mals fuss il Gambun staus avunda.

Alluscha ton ei franc. Ir per il sontg Ieli giu Cuera ei adina stau e vegn e adina a restar - ina honor scosauda. Quei ha il Giachen Giusep Gamboni saviu, accurat sco ses antecessurs. Ed igl ei fetg da supponer ch'ils vegnentsuenter sappien era quei.

Pigl auter.

Mo per dir.

In honorari da dus francs e miez per pervenda ed in franc e tschunconta mintgamai per las caplanias, quei tut ensem dat daveras buca ina gronda summa.



La famiglia Gamboni en Tujetsch setegn fermamein vid quella isonza familiara. Dapi igl onn 1965 va Meinrad Gamboni (1937) per il sontg Ieli giu Cuera. Ed el va mintgamai la gievgia sontga cun siu auto tocca sin la Cuort el casti digl uestg ed empleina la cofra. Aschia cun il vehichel ein las staziuns da contonscher maneivlamein.

Na, igl ei buc quei ch'igl ei stau antruras. La premura e la reverenza ein tscheu e leu sin sespiarder. Catechetas e casarinas dalla casa pervenda vegnan encunter e corrispundan ad enzatgi.

Meinrad Gamboni 1937

La marena sin claustra lai era il Meinrad Gamboni buca ir ina solia ga surora; aschia paun e schambun ed in migiel vin, uigliez. Quei ei tuttina ina allegria. Pader Bernard Bürke ed il Frater Leci Cavegn ein schi hofflis davos meisa.

Tonca pressapauc allas quater dil suentermiezdi ei Meinrad Gamboni adina a casa a Sedrun.

Buca meins che quater nevs dalla schalatteina Gamboni en Tujetsch ein promts da cuntinuar cun la tradiziun dils Gambuns, per cass che las duas feglias dil Meinrad bandunan l'isonza.